

Gyaez De Couh Lai Buenx De Di

爱她就多陪陪她

□ Moz Liujgvei / 莫柳桂

Youxdoih gawj bouh denyingj yungh le 3 bi seizgan bae ingj ndeu hawj gou, coh denyingj neix heuhguh 《Raeuz Song Vunz》. Denyingj cujyau dwg gangj aen goj daxbuz 90 lai bi gag youq aen swhozyen Baekging ndeu caeuq dahsau youq Baekging doegsaw ngamq miz 20 lai bi ndeu. Dahsau siengj youq henz yozyau co ranz, de youq ngoenz seizdoeng ndeu ra daengz aen swhozyen daxbuz youq, aen goj song vunz hix couh baenzneix haidaeuz le, lumj seiqgeiq doxlwnz nei, song vunz yienznaeuz mboujseiz doxceng doxnauh, gamjcingz cix bienq ndaej yied daeuj yied ndei, miz maz saeh mwngz ndaej baengh gou, gou hix ndaej baengh mwngz. Daengz seizcou bi moq, dahsau ra ndaej aen diegyouq engq ndei ndeu, daj ndaw swhozyenz buen okbae lo. Dahsau buen deuz liux, daxbuz sikhaek baenzbingh, mbonq hix hwnq mbouj ndaej. Satlaeng denyingj, louz hawj bouxyawj gij gingdouz aen swhozyen baet ndaej seuqsak、yaemzrwg ndeu caeuq aen dou gaeuq deng dahsau najsaeq gagdog gven.

Yawj denyingj seiz, yawj daengz ndaw bingzmu song boux vunz ndwenngoenz gvaq ndaej gig nauh-yied, mboujseiz hawj gou gamjdoengh

dangqmaz. Dahsau vihliux guh ndei gij hong yozyau, heuh daxbuz hawj de luzsieng, dahsau cam: “Bingzseiz mwngz guh maz saeh lwi?” Daxbuz dap: “Mbouj guh maz.” Dahsau caiq cam: “Mbouj ndaej, mwngz caiq siengjsiengj.” Daxbuz dap: “Mbwq seiz, gou ceiq siengj miz saek boux vunz sou huq gaeuq roxnaeuz boux byaij loek ranz daeuj roq dou ranz gou, yienghneix gou couh ndaej caeuq de gangjgangj vah.” Geij coenz vah neix hawj gou gvaengzda sikhaek dumz hwnjdaeuj. Doeklaeng dahsau daj ndaw swhozyen buen deuz, daxbuz bingh dai, engq dwg hawj gou daejngungu, cij aenvih gou siengj daengz buz gou.

Buz gou ndaej 90 bi bihaenx loeg nyied ngoenz ndeu, ciengxlnwenx dwk lizhai dou lo. De lij lix seiz, fuengzcug gou youq ndaw mbanj dwg dandog aen fuengzcug 5 daih cungj youq ndeu, buz baez dai, sojmiz cungj bienq lo. Gij bi mbouj miz giva seng lwngyez haenx, buz gou gungh seng 10 boux lwngyez, ciengx hung 8 boux. Youq ndaw fuengzcug dou, buz gig miz viyiemz, maz saeh cungj cam de le caiq guh gietlwnh. Daeglwg、lwgbawx、dahlwg、lwggwiz hix cungj hauqswnh, mbouj miz bouxlawz gamj yungh sing

sang daeuj caeuq de gangj vah. Daengz ngoenzciet ndwencieng, gyoengq ciuhlwg engq dwg cungj daeuj ranz yawj buz, soengq cienz soengq doxgaiq. Daj vunz baihrog daeuj yawj, buz dwg boux vunz miz fukheiq ndeu. Dwg, daj gij doxgaiq yungh gwn daeuj yawj, buz itcig fouqmiz, hoeng, ndawsim de siengj maz, cix mbouj miz bouxlawz roxyiuj. Buz 20 bi seiz haq hawj goeng gou, song vunz caez gvaq le 50 lai bi, baenzgya laebnieb, seng lwngyez ciengxson lwngyez. 17 bi gonq, goeng gou sawqmw h baenz binghgaenj gvaq-seiq le, doeklaeng buz gou couh gag boux vunz ndeu gvaq.

Boh gou dwg daeglwg ceiq iq, ndaw lajmbanj miz fungsug, vunzgeq itbuen caeuq daeglwg ceiq iq youq. Hoeng, bohme h gou dwg vunzguhnaz, baenzngoenz youq ndaw reih ndaw naz guhhong, gwn haeux yietnaiq cungj mbouj dinghseiz, vihliux hawj buz habseiz gwn haeux, goeng dai le boh gou couh genjdan h gaijcauh song fungh rug baihgvas ranz gou, aen rug baihndaw hawj buz guh ranzcawj, aen rug baihrog hawj buz guh ranzding, lij youq rog dou nda aen loengz gaeq ndeu hawj buz ciengx geij duzgaeq daeuj gaijmbwq. Geij bi

gonq, boh gou lid song fungh rug haenx dauqlaeb baenz fungh rug hung ndeu, ndaw rug vanzlij hawj buz cawj haeux daihhek, cijdwg ranzcawj caeuq ranzding mbouj miz faq ciengz daeuj lanz lo. Buz couhdwg youq gizneix, gvaq geij bi mbouj miz goeng gou.

Lumj haujlai vunz nienzgeij ca mbouj lai haenx ityiengh, buz mbouj nyinh saw, cij rox gangj Vahcuengh bonjdeih、Vahgveiliuj genjdan h, mbouj rox gangj hix dingq mbouj doeng Vahgun bujdungh. Dou sam beix-nuengx lij iq seiz, daengx ranz caez yawj densi, cungj miz boux vunz ndeu naengh youq henz ndang buz, geij hawj de dingq ndaw densi seizneix gangj maz. Doeklaeng, dou sam beixnuengx lizhai ranz ok rog bae doegsaw, bohme h gou youh nyaengq guhhong nyaengq bae ra cienz daeuj hawj dou doegsaw, mbouj miz seizgan buenx buz gangjgoj caeuq yawj densi. Buz dingq mbouj doeng gij vunz ndaw densi gangj maz, naengh youq henz densi mbouj daengz 10 faencung couh mbouj dingz baiqdalaep, caiq doek-laeng, mboujlwnh bouxlawz baenzlawz gienq, de cungj mbouj nyienh gag boux vunz ndeu hwnj laeuz bae yawj densi lo. (caengz sat)

·gojriu·

Gvanbaz Ngawz

傻夫妻

□ Banh Vwnzcingh/潘文清

Ndaw mbanj raeuz miz doiq gvanbaz ngawz ndeu, ciengzseiz gag haenh swhgeij coengmingz, guh saeh ciengzseiz gag lingh mbouj doengz vunz, hawj vunz liuh mbouj daengz, mizseiz youq dangqnaj vunzlai saetnaj.

Miz baez ndeu, ndaw mbanj miz vunz guh hoengzsae h, gvanbaz neix caemh miz faenh gwn. Goenggv an siengj: Aen dungx boux vunz caeuq aen daeh doxdoengz, yied hoengq cang ndaej doxgaiq yied lai, danghnaeuz yaek youq ngoenz laeuj gwn ndaej lai, itdingh yaek hawj aen dungx hoengq liux bae cijndaej. De gag lai hnaeuz aen banhfap neix ndei, caemhcai q lwnhnaeuz mehyah de nyi. Mehyah de baez dingq, riu naeuz: “Goenggv an gou caen coengmingz.”


Gangjsat, gyoengqde sikhaek guh lo, daj ngoenzgonq hoengzsae h couh mbouj gwn haeux lo. Seizhaenx caen hoj ngauz lo, gvaq ngoenz ndeu couh lumj gvaq bi he nei, hoeng vihliux ngoenzcog gwn ndaej lai, caiq haemz caiq hoj cungj aeu dingj gvaqbae. Gyoengqde iek dwk din fwngz unq liux, deq dwk yaek dai cij daengz ngoenz daihngeih bae gwnhaeux. Hoeng aen dungx iek gvaq mauh,

gyoengqde haeuj daiz ngamq gwn ndaej gaiq noh ndeu, couh gwn mbouj roengz lo.

Yawj gij byaek gwnz daiz lailai daihdaih, byaek ndei noh feih, sw hgeij cix gwn mbouj roengz, aen dungx lumj miz di in dem. Goenggv an yawj gyoengqvunz gwn dwk feihdauh raixcaix, caemhcai q itmienh gwn itmienh haenh mbouj dingz, youh dahoengz youh sim’in, doeklaeng nyaenx mbouj ndaej ndaq hwnjdaeuj: “Bang vunz sou caen dam gwn, gou vihliux donq haeux haemh neix, cuk-cuk iek le song ngoenz hwnz ndeu cij ngamq gwn ndaej gaiq noh ndeu, sou yienghneix gwn, lauxsaed gangj, haengjdingh iek ndaej geij ngoenz lu ba?”

Gyoengqvunz mbat nyengh, yaep he cij singj gvaqdaeuj, nyaenx mbouj ndaej riuhaha hwnjdaeuj. De raen le lij mwnhsaengsaeng dwk naeuz: “Riu maz riu, gou dwg gangj vahasae d.” Siengj mbouj daengz, gyoengqvunz riu ndaej sing engq hung lo.

Caiq miz baez ndeu, goenggv an youq ndaw ranzcaw gwnz laeuz cinjbi ronq noh loengh byaek caeuz, hoeng fag cax mwt raixcaix, ronq geij baez



Giuzlungz Guengjsae.

gaiq noh cungj mbouj gat. De byaij ok dou daeuj coh laj laeuz hemq: “Mehyah, fag cax mwt lo, mwngz vaiqdi dawz ndaek rinbaenz hwnjdaeuj hawj gou baenz cax.” Mehyah cingq youq laj laeuz sousib hongdawz, dingqnyi goenggv an hemq, couh han naeuz: “W, mwngz caj yaep he.”

Mehyah byaij daengz henz rinbaenz, de siengj: Ndaek rinbaenz hung lumj aen bat nei, baenzlawz dawz hwnj gwnz laeuz bae ne? O, miz banhfap lo. De riu j aen gyoi daeuj, yungh haujlai rengz cijndaej dawz ndaek rin buen haeuj ndaw gyoi bae. De coh gwnz laeuz hemq: “Goenggv an, mwngz dawz diuz cagvaiz henz cauq gveng roengzdaeuj hawj gou, gou cug aen gyoi cang rinbaenz ndei le, mwngz

cai q beng hwnjbae, couh ndaej baenz cax lo.”

Cag cug ndei lo, goenggv an yungh caenh rengz daeuj beng, ngamq beng daengz cungqgyang couh naiq lo. Mehyah hemq naeuz: “Deq gou, gou hwnjbae bang mwngz.” De doq gangj doq buet hwnj laeuz bae. Song boux caez yungh rengz, dauqdae j ndaej beng hwnjdaeuj lo. Song boux youh caez yungh rengz buen ndaek rin okdaeuj. Goenggv an itmienh baenz cax itmienh naeuz: “Va, mehyah gou caen coengmingz, siengj ndaej aen banhfap neix okdaeuj. Gou saenq, lajmbwn haengjdingh mbouj miz vunz siengj ok cungj banhfap neix daeuj lo.” Mehyah dingq le, riu dwk ndaeng gonraurau bae.